



2

2

袁永之集卷之十五
記

湖州府學尊經閣記

遷尹和靖書院記

長洲縣學射圃記

廣西副總兵公署續題名碑記

嘉定縣令題名記

遊玄墓諸山記

遊張公善卷洞記

遊金焦山記



遊西洞庭山記

聞溪草堂記

菰城草堂記

遊桂林諸山記

遊乳洞記

遊朝陽淡巖記

遊浯溪記

遊南嶽記

遊匡廬小孤山記

遊九華齊山記

池陽觀龍舟記

袁永之集卷之十五

湖州府學尊經閣記

湖州府學尊經閣成太守陳公瓚謀立石詔遠
乃命教授陳子祥麟以告袁袁曰湖有學宮蓋
自漢始乃尊經閣則創自今矣夫飭政者務立
教敦教者務正經經正則統壹統壹則民勸閣
之創也以立教也其規侈其功艱願子記之袁
袁曰夫尊經者世衰而後爲之者也先王之始
立教也張學以聯材選師以布軌植行以崇倫
尚齒以習遜考業以居功賞譽以勸善威罰以

懲忒此教之所由興也世之衰也文繁而偽滋
言淆而質敝政靡而紀毀禮喪而俗偷聖人於
是乎述上古之訓脩先王之業度禮義之衷稽
因革之會定性命之準以道民趨而六經者作
經者所以示民有常扶教救衰之本也末世典
籍焚錯訓詁繁興習章句者陋而寡效獵詞華
者靡而忘實議同異者辯而不情此三者叛經
之大患也上之人懼焉於是乎尊經以示之而
民乃不惑故曰尊經者世衰而後爲之者也閣
始功於嘉靖丙戌秋成於戊子夏高五丈有六

尺袤廣八丈有三尺延之數與高等匠石五材
之費總千二百有奇今中丞劉公士元之刺湖
也實肇厥基繼馮公曾萬公雲鵬度地歛材廣
方隅計徒庸經畫者三載而工告成矣協事者
則烏程知縣鄔子紳戴子嘉猷歸安知縣戚子
賢董役則訓導張子文閣左右爲顏魯公任孝
子二祠戴子所續建者夫祀顏以勸忠祀任以
勸孝忠孝者經之訓也附之者亦尊經之意也

遷尹和靖書院記

和靖書院舊在虎丘西菴遺基久湮天水胡公

續宗來守茲土考道之暇大懼荒沒爲往哲羞
抑無以法將來即故地祠而祀焉又以僻在郊
外學者罕至乃徙祠於龍興寺榜其門曰和靖
書院扁其堂曰三畏列楹周阿揭虔妥靈顧瞻
弁裳聳焉起敬又以香火於緇衣懼歲久浸怠
乃選縣膠弟子員絃誦其中修皇王之業趨孔
孟之軌以無忘和靖先生之意公暇則游焉橫
經析疑躬督肄習設俎豆醖箏于堂上懸夏楚
朴箠于堂下董以學官申以科條將使四方則
之後世傳之曰蘇湖之教其再見乎公之志也

初尹肅公師事伊川爲程門高弟遭宋不造闔
室嬰金酋之害沉淵逃劉豫之聘振鐸于茲卒
以窮死所寓齋亭又復圯壞使其不得志於當
時者又將無聞于後世惜哉公是舉也蓋兼三
善焉屏淫昏之鬼以攘異教崇往哲以修典刑
振黷校以訓齊群胄後之人能率其故典時加
敦勸俾無遺墜則觀旂之什協于闕宮矣諸生
誦法孔子而不知相勸于古道者其何賴于茲
院成命表記其事而鏡之于石

長洲縣學射圃記

長洲縣學蓋故有射圃云孫侯視學之明年整
壹法軌興修禮文士既向風乃考彛章循典訓
曰維是射圃之不治鞠爲灌莽于何考德事其
在我乃即禮殿之東隙隅而卜食焉芟屏緇翳
羅剔砂礫量物鳩徒庀材計庸凝土搏埴基高
崇庠辨階位列方次畫侯壘豐軒堂門楹畫革
荼張而射圃完矣乃屬記于余書不云乎侯以
明之習于虞庠試于澤宮夫禮射三代以來未
之有改也 明興文教熙洽邇來承平既久而
法禁漸弛黌校崩頽絃誦滅息污萊阨蠹講肄

無所又何射圃之能爲君子曰孫侯其達於禮
矣今天下之典教者皆若人焉禮教其興矣乎
是故記之以志廢舉且使後之人有所考焉

廣西副總兵公署續題名碑記

副帥張公鎮廣西者十有三年威武大揚蠻方
既邊乃嘉靖壬寅之冬拜貴州總兵以公署續
題名記相屬余謝不獲乃爲之記曰廣西古百
粵地也周秦以上不登於職方漢始置吏

皇朝初命楊璟朱亮祖拓地開藩封以 宗王
鎮以大將督以重臣守以內宦其始三府並建

百粵用寧居重馭輕安不忘危慮至深遠也景
順間廣東西黃蕭養侯大猷等耗亂命故襄毅
韓公雍討平之成化初韓公以憂去蠻孽再叛
朝廷採陶魯之議乃改立三府于梧州而廣西
則設副帥乃後藤峽左江賴以帖息而脩荔古
田柳慶諸蠻日以蕃滋數出剽殺卒莫能翦何
則權奪而勢分事格而令不壹彼重則此輕理
固然也弘治間議者欲復 高皇帝之舊制改
三府于桂林而大司馬鈞陽馬公竟寢其議八
十年來雖名將踵出如歐信康泰諸公皆能策

懋勲樹宏譽以隨時立業而馬俊之變竟付之
莫問此則權輕之明驗也張公挺卓犖之材閑
孫吳之畧沉鷲有威機權多智二十而總戎行
三十而建旄節奇功累建俘馘無算其大者如
立都狼之堡剪弩灘之蠻禽思田之逋寇降交
南之元憇皆躬履矢石跋涉山谿裹革以從塞
旗而奮用是百蠻震疊三江晏謐雖狗鼠間發
而豺虎架屏行旅無壅師徒不勤故能受元老
特達之知紓 天子東南之慮金帛優錫爵秩
荐加位極元戎手握重寄斯可謂光乎前人也

已念惟題名之石創立已久姓字已盈大懼徃
哲之遺烈湮沒莫考爰琢貞珉以書鴻伐將使
後之視今亦猶今之視昔奮功者勸僨事者戒
不其躡歟余聞古之名將位益高而心益下撫
士卒如嬰兒故能得其死力爲 國家甚大難
立大功紀之丹青鏤之竹帛聲施乎無窮豈特
焜耀一時而已哉今西北告急猘孔熾如張
公之材固不止小試之南陲而已也余旣以勗
張公又以勗後之人

嘉定縣令題名記

余讀漢循吏傳而歎吏道之難也漢有天下四
百年吏以最稱者幾人哉今天下吏親民莫如
令權壹而職專苟心乎愛民奚所弗濟故先哲
以未嘗親民爲耻意深遠矣 皇朝統有萬邦
列聖重守令之選繇是循良相望光掩前策
而百八十年來其赫赫可稱紀者猶僅僅也嗟
乎難哉難哉嘉定古東婁地也距郡治百四十
里志曰故崑之嚠城鄉縣治在春申鄉練祁市
宋嘉定置縣元爲州 皇朝初因之乃洪武二
年復縣置令而迄今未有題名不其闕歟順義

張侯重以進士來令茲邑期而政成謂是弗可
已也乃蒐郡乘詢黃耆由洪武以迄嘉靖得若
千人將鐫其名字爵里於石而以記屬秦惟嘉
定瀕海而襟江數患盜警且土無異產舟車艱
塞百賈罕游民苦重賦令於茲者不尤難哉按
郡志宦蹟載僕斯而下凡六公弘德以來雖未
及纂續然吏治精核而純實亦少衰矣豈漸靡
使然哉張侯之亟是也其有感也夫夫古者今
之鑑也往者來之轍也辨體以經治者存乎典
彰往以詔來者存乎文典以軌物文以永世公

署之有題名古也以觀以興以勸以戒賢則企
而刑焉否則撻而訕焉其庸庸者則耻並列焉
是先民之所以旌淑而警忒者也非所以崇侈
飾觀也張侯之亟是也亦猶行古之道夫覩茲
石者沿近以遡遠規今以準古雖百世可知也

遊玄墓諸山記

吳之山惟玄墓最僻而亦最奇面湖而險隩丹
崖翠閣望之如屏背鄧尉而來法華障其前銅
坑青支迤邐其左游龍界其右岡連嶺屬詭狀
異觀相傳郁泰玄葬此故山以名山之奇經唐

宋不顯自萬峯和尚披萊鑿石脩乘其下故山亦名萬峯其陽有萬峯塔院過此則有中井井故萬峯所掘於山爲中渟泓感沸飲之如雪山多美箭蒼蔚崖巘間級石而上得浩公房湖閣望中縹緲峯益軒而法華益卑楓林橘岫丹塗綺錯閣下多高松風起則谷嘯水涌聲聞數十里宴碧照軒宿新院而軒院皆面湖望中如浩公房湖閣惟益菑萃也其尤奇則在絕頂一登則洞庭諸山悉陷伏浮於湖而湖波遂混茫蕩爲一色不知其所窮山之麓有奇石甚詭麗在

盧橋下勢欲飛動茲山之奇晨則觀日出夕則凌倒景而四時皆可居自東崦入四面皆山望鄧尉鬱鬱已有武陵山陰之想緣溪至虎山橋橋亦在亂山中而六水繞出其下波聯震澤映帶不已趨玄墓者必自茲始而奇亦畧相及是故詳記之

游張公善卷洞記

張公洞去宜興四十里而善卷稍遠乃與溧陽近初方山人質甫述二洞之奇而尤奇善卷謂其上乾而下水也勢如重樓云余之會葬于溧

陽史氏也文仲休承實同舟焉舟發而雪甚入
荆溪則四山皆雪也望之如瓊臺銀闕而孤月
照耀下上一色於是肅徒揚舲引觴浮白誦來
思之什歌月出之章望溧陽而進焉歸塗逢華
君從龍乃相與爲善卷之遊循山而上攀蘿踐
苔蛇徑盤紆百折而抵洞口石門開豁土原平
敷外峻中軒敞如堂闕仙牀旁列玉柱上竦鍾
乳交懸險滑難入詢之士人曰此乾洞也下有
大水洞而小水洞在其旁乃緣崖而下壁削泉
飛湍濤噴激聲如萬雷從者凡數十人雖喧譁

不相聞下多亂石沉浮水面而洞無徑可入且
冬月水冷不利涉余獨攝衣跣行者百步同遊
者咸莫能從焉既乃踞坐磐石飛觴沉飲又令
一僕肩立休承題名陟崖而出遊善卷之明日
乃至張公洞洞在山麓而洞門仰開俗所謂天
窓者也洞口多雜樹蒙密翳蔚望之深黑既下
則甚明曲磴盤複香臺崛峙石形紛詭森若刀
戟懸如鍾鏞綠逾翠黛白疑霜雪路愈狹而石
愈奇縱橫起伏殊難模狀乃張列炬而觀之丹
竈芝田往往而在深昧不可窮乃穿後洞口而

出袁子曰余之遊二洞也而知方山人之言未足據也諺云耳聞不如目睹信矣乎夫上乾下水善卷之奇誠罕匹矣而天窓之異未可少也余嘗觀華陽林屋咸自外入未有自上下下如天窓者而張公之石特怪奇過善卷遠甚夫二洞者未可以優劣也既游之明日休承圖之而余爲之記

遊金焦山記

金焦山屹立江中流險峻而奇然金當潤州之咽喉渡江者苟好事必遊焉而焦山則僻故遊

者特鮮余之遊金者再矣而焦獨闕庚寅之秋余將北轅也乃有事于金焦焉時秋高氣清天風和融水波寧緩窮日而遊兩山亭閣軒臺攀躋畧盡客曰夫兩山者孰勝袁子曰金狹而巧所眺者廣焦廣而幽所眺者狹此兩山之槩也夫江發于嶠冢赴于海而潤州者當其下流江之奔也勢若赴壑金焦者適當其衝束其隘口截之使緩此兩山之功也昔余有四方之志焉如浙之天台鴈宕閩之武夷江右之匡廬荆湖之衡嶽武當洛之嵩卽魯之泰山晉之恒霍秦

之終華蜀之峩嶻劔閣咸思縱觀以畢吾願而未遂也蓋所覩巨麗者三焉曰震澤曰大江曰黃河此天下之大觀也而金焦者抑又其次乃於是作遊金焦山記

遊西洞庭山記

夫覽山川辨物宜稽民俗舒情性遊之槩也西洞庭去吳城百里余自胥口抵山館于林屋山人山人負經濟之學數奇而山居因山創樓名曰玄秀消夏環其前縹緲倚其後山之勝萃于茲矣是日也遂登縹緲之顛山有九峯而縹緲

獨峻援而上掖而前既登則東洞庭如帶而七十峯特小湖常諸山皆若屏拱落日陷波中金紫萬狀遊之明日泛消夏灣觴于小龍山而歸又明日度蔡嶺憇明月灣登石公山山之陽有石板其半没于湖猶可坐千人乃相與濯足而歌曰山厓屢兮石如砥湖瀕洞兮百川委又觴而歌曰震澤定兮水朝宗億萬年兮仰禹功於是舍陸而遵舟復館于蔡氏明日乃遊上方諸寺山人知余將歸明日乃同遊毛公壇觀林屋洞洞深黑而中甚卑入者皆俯而進余獨與文

子探隔凡而出題其旁曰通仙隔凡洞之最深處也山人曰子歸矣山有曲巖其石如黛峻而秀不可以不觀乃觀之遂張帆而歸袁子曰西洞庭東南之沃壤也梅梨橘柑楊梅枇杷魚鹽茶竹之饒錯以良田山之人朴愿而信塗無婦人可不謂美乎自夫差以來不被兵燹抑又美矣同遊者伯氏邦正文子壽承潘子脩伯山人者蔡氏九達也復有諸蔡皆同遊歸之明日而記其事嘉靖庚寅夏五月六日

聞溪草堂記

出闔閭城西二里爲武丘鄉里名采雲有橋曰聞德跨據通津引官漕渠水匯爲溪綠溪多竹樹腴田沃澤陂塘墳陵居民業漁稼本作俗龐嗇殷君良貴挾溪而居乃自稱曰聞溪子構堂三楹軒敞夷奧中列古圖書藥欄花石曲擅幽勝聞溪子性率直遇事颺發無留隱間歲挾貲游江湖藉奇羸爲酒食具歸卽召里中賓徒博飲拓落浮沉閑暇則約僮奴灌園督子姓誦讀章句君雖混跡市賈頗敦尚行義爲鄉之善人始余市門居室屢駢闐車馬紛衝貿易縱橫

肩排踵擊湫隘喧囂心殊厭苦之暨官京師日
奔趨公府塵塗鞅掌厭苦益甚頃以使事歸則
家大人已卜鄰聞溪矣辟喧就寂得少息焉孔
子不云乎里仁爲美余旣得屏居聞溪又喜殷
君之相鄰也乃爲作聞溪草堂記

菰城草堂記

菰城草堂者孫將軍之別業也出湖南城門由
碧浪湖緣溪而入崇岡秀嶺左環右拱匯以清
流包以廣墳谿多蒹葦菰蒲之類故曰菰城郡
志載春申君屯兵其地累土爲岡勢若城郭四

門排豁營壘分列城之陰多高山複重其下多
良田沃壤肥桑美箭樹木薈蔚陵衍陂陀登覽
之奇蠶稼之利土風之美居民之淳殆湖之武
陵輞川也孫君因城築室疆地疏池夏則芙蓉
獻芳秋則桂橘呈秀圖史充室觴筆在房暇則
徵賓張宴酣娛終日乃命其堂曰菰城草堂而
屬余爲之記

遊桂林諸山記

余到桂林者旬日即下蒼梧病瘴瘧還省即日
上章乞骸骨不報卧病四閱月復出視事乃七

月二十日熊師子敬邀余觀劉仙巖出城南七里得白龍洞俯瞰清潭石室窿然敞而高唐李渤命曰玄巖宋初更名白龍其陽即劉仙巖也相傳仙人劉仲遠居此歷磴而上洞府高寒旁有穿雲仙磧兩巖望中陽朔諸山森若劒戟皆獻奇目前應接不暇飲極歡秉燭而歸同遊者鄭太守質甫羅儀部時行也明日登桂山疊綵巖觀風洞歷華景山下有洞深廣如厦屋轉寶積山山多怪石其旁有呂公巖山之顛有諸葛亭或曰珠合無所考又明日日出就日門東北行

十里餘得清泉寺小飲復二里謁堯廟復三里登堯山觀天子田山有泉分二澗繞出堯廟淙淙可聽雜以松風如怒濤決峽小飲澗旁飯而歸環桂之山皆石此獨土蓋桂之鎮也是日復至七星山入棲霞洞穿曾公巖而出桂多巖洞然深奧怪奇未有逾七星者也復觀玄風洞而還二十五日將趨全州按察使葉公景暘副使鄭公本醇僉事林公世觀追餞于虞山謁舜祠觀韶音洞讀宋張南軒碑記山石奇峻下臨灘江旁有渡曰皇澤灣洞口有南薰亭唐宋刻石

具存余嘗讀范文穆公成大評桂山之奇爲天下第一初未之信薄言觀者乃知非虛夸也夫其千峯挺拔怪怪奇奇驟而觀之誠天下所未覩也然猶恨其多險峭孤危之狀而無高厚蜿蜒之觀山之體意者其弗若是歟且以桂山之奇秀若此乃無有鍾靈萃淑卓然名世者出乎其間而徒多猺獠獍狔盤據竄穴枕戈負弩以爲民蠹是曷故哉豈山川之險怪固生此類歟是余所疑而未敢以范公之言爲信也夜宿靈川公署而作此記

遊乳洞記

余旣試士興安問土人山水之可游者得乳洞出城西南十里路多榛莽至洞口有清溪石梁洞有三下曰噴雷中曰駐雲上曰飛霞下洞有泉流石壁間匯而爲溪觸石湍激有聲洞門軒敞其中虛明夏涼而冬溫其下石如田壟溝塍如鑿左旋至中洞烟霧冥濛有石柱三及石室石牀復左旋百步至上洞入門平曠水淺可涉石乳玲瓏有五色石橫亘其上秉炬深入石愈怪奇三洞蓋宋李邦彥名也有碑記及張孝祥

大書上清三洞皆在下洞口上洞有范成大詩刻徧讀之小飲下洞而歸夫桂多巖洞然三洞並豁亦足奇矣興安土風簡朴氓不知遊而三洞者竟不能閱見賞名流如范張李諸公將山川發靈因人益顯歟譬之士苟有奇雋瑰瑋雖在遐壤必能振奮施其聲光鵲起穎露欲自閔匿不可得也余於茲遊而重有感焉七月二十九日記

遊朝陽淡巖記

余嘗讀元結集知朝陽淡巖之勝癸卯四月五

日謝病歸發全湘七日抵永太守唐公國秀招遊兩巖自瀟湘門外渡江登朝陽巖巖多奇石翠黛如畫謁寓賢祠小飲前軒稍東轉而下石壁峭削俯瞰清湘曲欄危磴始抵洞口泉聲淙淙蓋外有澗道由地中而入者予濯纓焉復飲前軒而罷午後趨淡巖巖去朝陽二十里道中風土清曠不殊江南薄暮抵巖巖特高敞爽塏土夷燥可坐萬人巨石磊砢或玄或蒼如倨如翔洞門寬豁朗然虛明雖夏屋弗如也酒數行出洞已昏黑二鼓還舟中是日和霽歸途大風

雨渡湘甚危始知名山勝地登臨信有緣也漏
下四鼓作此記復賦二詩

遊浯溪記

四月八日夜至祁陽九日登浯溪溪面湘過香
橋溪水繞出山左聲崢然不絕讀大唐中興碑
及元宋人詩刻題名碑旁有鏡石高尺五寸潤
二尺五寸厚三寸餘嵌置崖石間上有宋人詩
跋石色黝黑如漆光瑩如鏡可鑑人鬚眉隔江
草樹田壟一一皆見予意石甚小且奇恐好事
者竊而去山僧云昔有竊去者石遂昏黯然無

光一無所見乃復歸于此則更明澈如初此殆
造物者之效奇不可以恒理推也謁魯公次山
書院登笑峴亭亭據危崖崖面江特奇峭畧如
嚴陵釣臺崖石有窪尊次山所鑿也復登唐亭
亭亦在危崖上稍卑於笑峴而荒破如之漫郎
宅已鞠爲茂草矣歸舟賦詩紀勝并寄唐公

遊南嶽記

四月十一日至衡太守何公善充招遊迴鴈峯
峯即衡嶽七十二峯之一也衡陽胡尹復宴余
于花藥寺寺在迴鴈峯西十二日子夜至衡山

大雨十三日謁南嶽廟廟在縣治西三十里卯
刻陰雨過開雲樓里許即晴至嶽廟風日開霽
旅愁豁然廟在衡麓下清泉繞除古松夾路闐
無人迹惟落葉荒草而已廟圯甚飯布政行司
換肩輿趨上封寺寺在祝融峰頭去廟三十里
山路陡絕飛瀑爭流行十五里憇半山亭下瞰
潭岳衡湘河山如繡過此石磴愈峻輿人皆肩
扶魚貫以索作牽纜前驅路旁多高松怪木珍
草奇花香馥穠郁莫可名物上半山亭五里即
雲霧冥晦只尺莫辨陰風凍雨令人毛髮灑淅

又十里入上封寺又三里登祝融絕頂謁四大
開山祖師像觀捨身崖坐會仙橋飛巖絕壁下
臨無地而虹梁跨其上信非人境也轉望日臺
俯視一氣冥濛了無所覩望中可辨者紫蓋芙蓉
天柱三高峯而已飯罷下山過觀音巖訪楚
石和尚贈以詩由西路歷祝仙菴雞仙巖澗道
飛泉山僧皆鑿石刻木引泉而飲至此忽開霽
如初仰睇祝融在雲霧中恍若九天之上回塗
飯南臺寺寺頗幽勝去祝融已二十里又十里
下嶽廟乘月歸舟中漏下已一鼓盡秉燭記之

明日賦五言詩六韻

遊匡廬小孤山記

嘗聞廬山爲吳楚名嶽蓋五嶽之匹也四月二十六日夜抵潯陽二十七日早飯罷貳守同年毛子行甫邀遊匡廬縣城南行三十里抵東林寺寺在匡廬之陰峯巒迴抱澗水湍激竹樹蒙翳清曠幽邃信佳境也過虎溪橋觀白蓮池酌冰壺聰明二泉登北麓讀李邕柳公權虞集碑文下飲三笑堂題詩而出行十里至匡廬山下始攀嶺三里至昇雲亭又三里至錦繡亭亭

下爲錦繡橋橋跨峻崖深壑飛泉爭流澎湃錡鑑如銀漢掛綵虹巖石紫翠黛綠古木陰森真錦繡也又三里至半雲亭山之半也過此山漸陡石磴迴旋甚危峻又三里至甘露亭即甘露泉在焉過石門題曰廬山高旁有石崖刻歐陽文忠公廬山高歌又三里乃抵披霞亭自此有小徑北上爲竹林寺乃周顛仙天眼尊者徐道人赤脚僧奕處上有高皇帝御碑亭旁有拂水崖東下復度嶺抵天池寺酌一滴泉登文殊臺仰眺赤霄峯宛在天上蓋廬之最高峯也太

史公嘗登其顛俯瞰蓮花芙蓉鐵船諸峯皆下
界矣謁聚仙亭露飲文殊臺前賦七言律一首
乃從舊路下山抵東林已一鼓矣四鼓抵舟二
十八日體憊不及遊白鹿洞順風而下午抵湖
口縣薄暮抵彭澤登小孤山山在大江中流四
面斗絕惟南面有石磴可登上有小孤廟山多
奇禽群宿樹杪無數見人皆驚飛散而復聚者
數四不可名或玄或黃或朱綠蒼翠其白者知
爲鷗鷺而已落日射江中如練如綺誦謝元暉
詩痛飲而下中流賦五言律一首夫廬之高深

鉅麗信匹五嶽然竟不獲一遊白鹿以快生平
之願頗以爲恨而小孤之奇絕足與金焦君山
爭衡古云失之東隅收之桑榆余之失白鹿而
得小孤殆是謂歟爰記之以俟他日爲白鹿遊
張本

遊九華齊山記

自安慶趨池陽二十里外即望見九華諸峯甚
奇麗五月朔抵池太守柯君光仲郡推雷君時
雍招遊齊山出九華門外綠翠微隄南行三里
爲齊山山多奇石巖壑秀美觀集仙洞招隱巖

小九華轉上清巖山之最奇處也讀杜樊川九
日詩刻及朱考亭和篇南下三奇亭觀石鼓洞
妙空巖仙人橋是爲三奇飲亭中一鼓還舟明
日再由齊山路東行五十里至玩華亭渡五溪
又三十里抵九華山下陟嶺十里餘到化城寺
謁地藏塔院及李白書堂小飲法堂貴池尹江
子青陽尹張子舜臣皆來會即馳下山是
夕宿五溪人家又明日午後始還舟夫九華凡
九十九峯初名九子山李白易名九華遠而望
之奇峯峻萼縹緲霄漢間如青蓮花爭開競發

烟雲蓬勃翠紫萬狀信東南名岳也然皆峭拔
不可登化城踰高入深複嶺迴抱踈竹清泉脩
然出塵齊山卑而景最多亭榭巖壑窈窕下上
愈探愈奇翠微隄兩旁皆澄湖如鏡溪山映發
昔王子猷有言使人應接不暇奚獨山陰道中
哉

池陽觀龍舟記

遊九華往返繇池陽城下時午節近江中多龍
舟數十艘蜿蜒曼延色按五方長年檝師所衣
如其色約一舟二十餘人急槳競渡輕捷風飛

從金伐鼓喝呼震沸江水若起立漢戲魚龍角
觝意即此類司馬相如言千人唱萬人唱不虛
哉池士女咸出觀江干多方舟幕布布席羅酒
漿釘著笑謹如狂問之池人云以是祈年昔夫
子不非蜡祭朝服及立鄉儼豈曰無以哉今海
內承平久幸數遭豐年是以黔首得康虞佚游
戲如此非 帝力孰致茲爰記之以示有位者
毋禁可也唐人曰好樂無荒良士瞿瞿池人念
哉瞿瞿哉

袁永之集卷之十五

袁永之集卷之十六

碑 誌銘 墓表

大司徒秦公封丘廟碑

贈兵部右侍郎陳公神道碑銘

柳州府同知伊先生墓志銘

封工部營繕司員外郎馮公墓志銘

封淑人趙嬪陸氏墓志銘

封太孺人申母施氏墓志銘

樓顯章墓志銘

盛嬪莫碩人墓志銘



吳圻父墓志銘

屠母陳碩人墓志銘

朱隱君墓志銘

陶舜舉墓志銘

沈子仁墓志銘

陶母閔碩人墓志銘

董宜陽妻楊氏墓志銘

沙良憲夫妻合葬墓志銘

章翁墓志銘

大理寺少卿董公繼室唐夫人墓表

中憲大夫臨安府知府王公墓表

張文理墓表

殷君同妻姚碩人合葬墓誌銘

袁永之集卷之十六

大司徒秦公封丘廟碑

祭法曰能捍大患則祀之而王制亦有受成於
學之文反則釋奠于學以訊馘告詩泂水曰矯
矯虎臣在泂獻馘是也大司徒秦公裒兵鞠旅
與劇賊選嘷殪之封丘以奠洛師在禮封丘宜
有廟祀而廟宜在學宮左右武廟初闡豎專
柄毒螫海內群盜竊發霸州人劉齊等招集亡
命出入齊魯間所過隳突殘破城邑賊殺長吏
燔燒剝剔流血成川積尸爲丘兩河南北悉被

蹂躪不復能制遠近繹騷撼搖京師已而長驅
洛邑攻延津逼封丘公時左叅藩司率先捍禦
群議洶洶謂宜宵遁以避其銳公叱曰封丘蔽
遏省城吾當與之存亡耳獨策馬登陴急選車
徒鍛矛矢申畫曹伍訓厲胄轂爲抗禦備則又
移檄監司要駐閩帥相與冒矢石擊賊於剗脚
之野一鼓而殲其鯨鯢俘其醜虜復追之長垣
捷奏 天子由是賊徒駭散奔伏他郡勢衰沮
不復振逾月而竄於狼山卒以蕩平噫祭法所
謂能捍大患者非歟方賊勢猖獗郡縣披靡莫

敢枝梧至有迎降納款者遂使草莽豎子橫行
六州無辜之民備受慘毒 當宁旰食張皇邊
戍僅乃克之向使典領方岳宰守郡邑得如公
者分布盤錯其間式遏亂畧懲之於始蓋不待
狼山而後息肩矣公之功於是爲大廟食之奠
百世可知也宜紀之以告來者詞曰 武廟嗣
服昊天降疵君側弗靖寺人蔽之攘竊威福濁
亂綱紀高下臆決僭擬 天子淫刑峻罰動觸
機罟神痾瘵顛階禰賈怒額額群宄嘯聚繹騷
封豕獠貽淵藪逋逃隳突齊魯憑陵河華吞噬

咆哮長驅中夏屍丘血渠殘破邑居焚掠剝灸
蕩爲丘墟幾輔震驚宛洛蹙脅窺我延津得之
詞謀顯允司徒佐藩于梁秉鉞塞帷齧其披猖
倬彼封丘洛邑之屏抗其吭咽捍我要領我鍛
我戈我服我矢王事孔棘示以必死群譁弗滅
神機潛握遮留闔帥相爲掎角虎旅桓桓蛇矛
如湍執訊獲醜截腦裂肝奔潰顛踣鹿駭狼竄
大憇肅清綏章有粲乃慰乃止梁有厚喜家室
謳吟荷耒負耒梁有城隍維公殿之爾耕爾蠶
維公燕之以削以築爰卜斯食思樂泮水作廟

翼翼清醑殺脯坎坎擊鼓稽首萬舞願言多祜
考茲新 宮丹雘攸崇史臣勒辭以紀膚公

贈通議大夫兵部右侍郎陳公神道碑

銘

兵部侍郎陳公洪謨既考績 天子制贈其父
爲兵部侍郎階通議大夫先是陳公官刑部主
事既贈其父爲刑部主事階承德郎而故太師
長沙文正李公亦既銘其墓矣乃今加贈禮宜
樹碑隧首復乞余銘謹按陳公諱良字時佐常
德之武陵人也王大父春雲南澂江府推官大

父維新浙江海寧衛經歷公初爲武陵縣學生
按察副使嚴公詮督學器公升之府學成化庚
子中湖廣鄉試甲辰中乙榜授四川開縣學教
諭開僻縣也俗獷陋學官多弛縱以便諸生無
師弟子禮公乃嚴立條格身先之程業肄文士
習丕變然未有舉者九載左遷常州之武進訓
導以母喪去官服闋補京衛武學訓導有 詔
舉學官有才行者武學以公名上而兵部不果
行惜哉公之官武進也兩考福建浙江鄉試咸
稱得人公有用世志而弗究厥施教其子洪謨

卒舉進士爲時名卿公之志亦畧酬見矣公善
屬文所著有開縣志西谷漫稿生正統丙寅九
月二日卒正德丙寅四月十二日享年六十有
一配王氏封安人贈淑人子男三洪謨次洪範
榮府引禮舍人次洪道女一適刑科給事中楊
禔孫男二一德蘇州府推官一貫孫女三墓在
長山坡之原銘曰於鑠陳宗世躋顯庸激江慎
罰海寧除戎絳纓聯蟬邁種維公木鐸再鳴式
颺儒風敷教以敬斂材則公秩庠志廣施嗇名
崇奕奕司馬旣孝且忠皇皇典誥永賁堂封

奉政大夫柳州府同知伊先生墓志銘

嘉靖甲午九月二十六日吾師伊虛室先生卒
遺言必袁生銘吾墓按先生弟伯羔之行狀曰
伊虛室先生者吳人也諱伯熊字臣舉其先海
州沭陽人也宋之南渡而遷于吳云 高皇帝
之初建金陵也徙人實京師故高祖彤者又籍
上元爲上元人封尚寶司少卿高祖妣朱封宜
人曾祖悌曾祖妣梅伯祖侃舉進士官工科給
事中祖溥封南京刑部主事祖妣顧贈安人繼
陳封安人父乘舉進士歷官四川按察司僉事

妣蔣封安人僉事公之赴蜀以道險欲分蔣夫
人與仲子伯羔乘他舟以防不測先生年十三
對曰死則同死耳柰何分舟乎遂同舟赴蜀故
金華潘公璋亦官蜀試先生文奇之命其子少
司馬希曾公同講習弘治庚戌歸南京兩試儒
士不第補應天府學生故御史四明方公誌提
學考先生第一命諸生爲經文會擇諸生之明
經者校文而校易者三人則先生與太常卿崑
山方公鵬少司寇太倉周公廣也正德丁卯中
鄉試戊辰會試今太宰吳公一鵬同考校易讀

先生初二塲文竒之列高選矣而先生以逆瑾用事非求宦時遂不終試吳公索三塲文竟無有也既而知先生名深加歎惜賦詩送歸由是名益振庚辰會試不第就選深州知州富民滿存投刺獲罪存嘗獲罪前守深人疑將爲前守復讐而前守適移書言深人短長先生謝曰人之善惡旬日異狀能改過即良民也對衆焚其書深人始安前守公務弗辦府使下州督促供張繁費民不能堪先生至則懲其慢令完其稽牒不旬日而辦乃後州事不愆期而府使不再

來矣於是節浮費均徭役招流氓辟荒萊獎黷校正禮俗而深以大治深地錯文霸寇劫肆掠乃增城浚滄簡士卒較騎射廣饑候山東鑛賊作亂聲張畿輔先生以公事出署事者驅民登城賊未至而民先疲先生歸悉散遣之倡勇敢申保伍期寇至則棄城民便而盜亦戒不敢犯境州人張廷雄于貲三子者濟惡武斷鄉曲持官吏陰事莫敢問亡何謀殺人廷自當毆殺罪而匿其子軋于勢家乃計捕其子罪以謀殺而群飲殺人者則止坐一人凡訟辭一覽即洞情

實吏畏悚莫敢舞文獄中常空張某先以累坐
死察其冤許以不死時張軋在獄約其反獄某
曰伊公信人也許我不死矣忍負之以速死邪
凡經擬斷囚自謂不冤而上官亦無改擬者諸
上官有事畿內若清牘稽倉檢災覆獄類承委
先生即事事當上官意無弗下禮幣勞獎者今
皇帝之入踐大統 駕出真定栢鄉縣真定
要衢也先生承檄攝事平道路理橋梁飭行宮
潔庖滷上供軍待下至帷幕器皿靡弗恪豫事
集而民弗擾胡僧班丹录竺奪民田萬事敗有

力者爭佃之乃歸其田于民而徵稅如故勢家
有侵民田者丈量而歸之癸未蔣安人喪歸深
人遮道泣服闕改守祁州祁去深百餘里耳下
車深人咸來謁絡繹于塗三月無虛日前守祁
者多良吏乃仍其舊貫益尚寬簡山西鎮守太
監張某族殺人求援於張張曰知州豈冤人者
邪他縣令嘗誤入人先生承委覆決其無理取
勝者謂人曰伊公不可欺遂以實首夫能使中
官不敢以私謁而無情者吐實此豈齷齪俗吏
瑣瑣者能之邪諺曰桃李不言下自成蹊此言

忠信之感人也其他宥輕刑故如此類者尤衆
北方力役繁三歲一易乃即役之難易家之富
貧而審均之正其冊籍狡吏斂戢民間養官馬
者日困則爲教以孳牧之術嚴其殿最之令而
民稍蘇矣訟罰贖者多令入穀爲斂散賑貸之
法徵賦則民皆先期納不答一人禱旱捕蝗必
躬必誠而旱蝗亦不爲災野蚕成繭令請以聞
則抑之李得山四世同居爲請于上官榮以章
服每造廬存問焉陳泰有粟二千石畧做義倉
以千石振鄉之不足則請致鄉飲鄉大夫之貧

而有守者加禮而周之在祁三年遷廣西柳州
府同知去之日祁人遮道泣猶深人也柳道遠
多瘴以病致仕歸歸則習服氣養生之術然竟
以此卒將卒不亂語大生曰吾得正斃矣夫何
言雖然吾死爾必儉用而下人先生學有根源
著易義四卷行于學者從游多名士性行方嚴
步趨繩矩而尤篤人倫事僉事公孝友其弟伯
羔教子以義微言細行皆可師法憶褻童而事
先生者四年訓以彝倫博以經術乃今又以墓
銘屬場室心喪之誼實鍾厥心又懼無文以恢

彰徽烈爲遺言辱惟先生學爲醇儒仕爲循吏
德行爲名賢必有尸祝紀藉以垂不朽者其何
賴於予小子先生生于成化甲午七月十一日
享年六十有一先配周大司寇莊懿公之孫繼
傅子男四大生廣生周出廣生先卒敏生魯生
傅出敏生舉壬辰進士任慈谿縣知縣女四長
周出嫁國子生朱完次俱傅出嫁何遠陳淵王
有輔孫男一在道孫女三許聘胡應王顯朝一
幼墓在吳縣查山麓銘曰吳有大儒明經術鉤
研幾深洞十翼繩趨矩折行作式河汾師師士

雲集深祁醇醇民寧壹績參龔黃古司直志崇
秩早壽年嗇黃璆玄帑委沙礫查山厓屢考終
吉小子刊銘表千億

封工部營繕司員外郎馮公墓志銘

公諱復陽字休父慈谿人馮故大族世載令德
大父民始以賢良薦于有司辭弗就篤學純行
爲族閭式父鈍習儻業歲貢授清流縣教諭有
子四人公其季也始從父訥無子且貧莫利爲
後而子姓中公最賢乃後公公之事從父猶父
也公資材敏警而學尤精深上溯經史下綜百

家言靡不貫悉他學士爲時文者咸推讓公然
獨數竒試場屋即斥弗利歲癸酉乃不入試有
勸之者曰命也夫吾文豈難一第邪且吾有子
矣豈必在我乙酉子岳舉鄉試丙戌又連舉會
試皆高等官工部營繕司主事庚辰考最遷員
外郎 天子嘉乃績褒宣制辭敷錫封典而公
適就養來京師遂冠服趨闕下稱謝士大夫咸
榮羨公公乃自稱曰今吾封如子官猶吾第矣
公性朴直儉恭寡交而秉禮外若簡易內操剛
嚴子岳之權稅蕪湖也廉潔之舉表于薦紳實

維義方之訓公旅居京師頗不習水土又沉病
驟興竟弗起卒之日爲嘉靖辛卯四月十一日
生于成化丁亥十一月十七日享年六十有五
配范氏封安人子男一即岳娶陸氏女一適陳
秀夫孫男二長熙皞次熙載岳將以某年月日
歸葬於某山之先茔乃屬銘於袞袞於岳爲同
年進士知公深乃爲之銘曰於惟諸馮克開厥
宗奕世令德載振于公有斐經術畀材維豐胡
卒不施適逢其凶利我嗣人逮于其躬文裾丹
纓秩隸司空奄其遐逝考終玄宮我銘其幽昭

茲鬣封

封淑人趙嬪陸氏墓志銘

始余官京師居邇趙君鴻遠甚暱善君時爲工
科都給事中有直聲一日以其季子伊來受易
朗然玉映美丈夫也叩之則靡不該涉而經義
尤精深志騰蹕謂古聖賢可立企余心竒之竊
嘆非趙君不能有此子久之乃知有母夫人之
賢居亡何趙君上封事言大臣過惡語極剴切
今皇帝詰責者再三衆皆爲君危趙君晨入
朝夫人則具青衣鞋襪以俟䟽留中未下趙君

歸舍夫人則又溫言慰藉如常及 命下止奪
俸京師士人皆歡傳 天子仁聖又嘉趙君謹
直乃不知夫人實相之也然趙君坐是不得內
轉竟出爲山西叅政而伊亦登進士高第矣未
幾語夫人曰吾將歸休若何夫人曰夫仕行義
以立名也君之宦成矣而且有子子之齒壯於
君而君弗歸將焉覲乎趙君乃抗䟽歸歸則謝
絕世務築園爲娛不問生產事 皇帝以言官
爭論薦起君參陝西政竟不肯起乃夫人日崇
肴醴以佐賓庖園中花盛開君觴詠盤薄不知

有家夫人力也歲甲辰夫人患痞悶膈氣遂不起正月之十有九日也趙君乃命其子述狀而以志銘委表按狀夫人姓陸其先嘉興人也曾大父信贅平湖嚴氏遂爲平湖人祖謙壽官父端世清白力田母張氏夫人其伯子也溫良樸厚夙稟自天旣歸趙君躬親絰辟屏斥華飾克儉克勤內外宜之趙君之推獄建昌也莫敢以私干者獄囚雷某坐死刑十八年矣君廉其寃也將出之其姻適館公衙乃爲微語舍人曰雷誠父繫破家然有金被數件請爲謝夫人知之

以白趙君君怒甚將遂弗理也夫人曰人命至重彼誠寃當理之豈以語言之故而輒弗理耶竟理出之夫人性純孝太孺人之危疾嘗藥羞膳不遑安寢及喪哭盡哀享祀潔豐御下有恩畧去驕貴之態趙君從宦踰二十年篋無私藏羔羊素絲之德夫人實助焉始以趙君貴封孺人繼以伊貴加封淑人生成化丙申某月某日享年六十有九子男四傳娶沈偕娶姚繼姚偁娶吳伊娶張傳偁俱縣學生伊舉壬辰進士歷任南京兵部職方司郎中女一嫁國子生俞鏜

孫男九邦穀邦穎俱縣學生邦導並傳出邦秀
邦黍偕出建賓偁出邦秩邦程建陞伊出曾孫
男二宗十成十長孫出也墓在縣治北許家浜
銘曰赫赫趙宗亢自黃門正色立朝諤諤有聞
繫孰相之曰維小君既贊直言再決勇退公志
先定試以謀內周任有言庶幾無愧鳳凰于飛
和鳴鏘鏘篤生諸雛賁我家邦翩其遐舉丹丘
斯藏

封太孺人申母施氏墓志銘

嘉靖壬寅上元日廣西僉事申公卒母施太孺

人傷感致疾其年六月八日亦卒長孫誠撰狀
乞銘於余余之同母妹誠室也頗知孺人令德
之詳乃按狀而志之施太孺人者吳江之施家
村人也父昌母俞氏幼稟淑嫻勅贈錦衣衛經
歷申公聘爲側室及歸外內宜之生僉憲公旣
長貧無以爲教太孺人脫簪珥延師教之正德
戊辰僉憲公舉進士拜樂安令時流賊犯境太
孺人方就養官邸僉憲公有內顧憂太孺人曰
汝毋我念謀人之邑惟力是視耳未幾改尹德
平或謂德平人獷悍宜峻刑太孺人曰無以爲

也蠻貊之邦猶可柔服矧茲地隸鄒魯素敦信義者乎僉憲公乃務任德教聲績卓起入遷錦衣衛經歷尋出爲湖廣僉事改任廣西以不能事上官罷歸太孺人喜曰乃今得與吾兒長共朝夕矣然竟相繼不祿命也夫太孺人性莊靖不妄言笑御下有則歷事舅姑夫子及正室吳孺人咸當其意伯子恩吳出也遇之加於已出僉憲公歷官廉慎太孺人訓也子男一即僉憲公惠娶吳封孺人女一適葉惠孫男二長即誠邑學生娶顧繼表次講國子生娶史孫女一曾

孫男三長孝邑庠生聘曹次弟未聘次忠聘王曾孫女二太孺人生於天順三年三月二十九日享年八十有四葬以甲辰十二月二十日墓在梅里村柳字圩銘曰詩咏嘒星易贊顛趾於維孺人誕毓厥子載貽孫謀永錫繁祉

樓顯章墓志銘

樓之先家會稽宋南渡始顯有諱昇者仕至徽猷閣學士太師封楚國公有諱鑰者叅知政事少師謚宣獻隱君之九世祖也再傳曰楷楷生思廔思廔生紹紹生澄澄少孤育于母氏來家

于蘇就戚府辟教授事其母孝澄生宏宏生序
序生子二長即君君諱翰字顯章幼受學於進
士奚元啓通章句大指然不樂仕進乃以訓其
鄉之子弟君性高簡歲不一入城府耻干謁王
公貴人雖鄉飲不赴顧自謂拙也名其齋以拙
所與倡和悉逸民學士詩冲遠慎體裁享年七
十有八生于正統某年月日卒於正德某年月
日配錢氏先卒生子男一曰節繼曹氏生子男
二曰復曰渙女四孫男六孫女四卒之又明年
月日將卜葬于清溪之原乞銘於余余聞公侯

之子孫必復其始樓氏自徽猷而下兩世爵上
公代有達者迨隱君三世弗仕矣然皆業儒素
表于族間揆之天道將必有昌其後者以耀厥
光終隱而已邪銘曰載熾而昌中闕以減卒蹶
而張於維孫子尚勿替以荒

盛嬪莫碩人墓志銘

莫之先湖州歸安人宋南渡徙吳江之綺川里
族世貴顯 高皇帝時有諱溫者嘗以耆德召
見參議大事而貞孝先生轅則碩人大父也父
諱震字霆威正統五年進士歷官建寧府同知

母馬氏雲南叅政升之女碩人承襲華閱夙閑
禮訓植性端貞婉惠曉書計能誦讀孝經小學
稍通其大旨及笄而歸于盛君用勤盛故宋叅
知政事文肅公度之後用勤又以世業薦授府
醫學正術劑多奇効且敏幹每爲上官任使碩
人獨約束其家人閭序雍肅事舅姑曲盡禮孝
凡祀享饋饗必躬親致潔豐敦尚儉素屏脫華
飾易置田畝產業益殷初碩人舉子多不育乃
爲用勤擇娶馬氏生二男子愛之如已出則爲
開塾訓誘督責成立逮下之慈廣嗣之義君子

以爲難享年六十有二生於成化四年九月七
日卒於嘉靖八年七月二十三日子男二長延
年娶夏元澤女次幼並馬出女二長嫁王珏次
諸驥卒之明年某月日將祔葬于奇禾額之先
茔乞銘於余銘曰猗世胄令只乃作嬪君子宜
于而家維德之徽矣仁維逮下兮以燕翼繁祉
封若堂兮考玄宅土之剛兮安且吉銘厥幽兮
永無斃

吳圻父墓志銘

吳圻父名封吳人也父燿太學生母錢氏圻父

其中子也太學公有子三人而伯叔咸夭死乃
今圻父又夭傷哉圻父少受學于故太學王君
履吉甫弱冠卓然爲高第子操筆章藻粲然可
采兼通伎藝書奕各理咸悉其槩而行業潔脩
儕流多稱之娶楊氏楊頗厚貲稍爲治田宅得
其力然圻父能自樹勵志篤學且多計筭持其
門戶不敗力田營貲雖老農老賈弗如也外貌
娟溫而中懷臧否頗多口怨性復藏蓄事拂意
者壹鬱不能忘厚自奉養肴羞皆膏粱珍竒膳
炙薺辣習以爲常卒以此病火毒攻結疔瘡發

作磨頤癯潰心腹薰裂旬月而死傷哉圻父躬
穎秀之資而年止長殤各混下士老母在堂孤
嫠在室烝然無子女譬之蜉蝣朝生夕死傷哉
傷哉初太學公恙年交予圻父視予猶兄也朝
夕相依從談惟文史耳死之前三月與予觀浙
江潮歷西湖諸山出岳武穆祠下論說趙宋興
亡扼腕歌呼痛飲浮白徘徊孤山隴然有箕穎
之想素不賦詩至是篇章肆作雅辭鏘鏘觀者
嘆美乃今死矣追念武林之游俯仰今昔傷哉
傷哉銘曰耕疾淵亡古所悼也鳳殞麟傷今則

天也自天殲良又誰告也

屠母陳碩人墓志銘

袞袞曰夫禮士踰月而葬乃今碩人之卒且十四年矣葬何遲也悲夫余讀其子雲鳳之狀而傷碩人之志也碩人之將死也雲鳳冠矣方業賈碩人泣曰夫賈利以養也而父死今吾又死將誰養乎而其爲儒吾死不死矣雲鳳乃感激習儒業未幾補郡學弟子員試輒高等將仕而後葬其母也乃今葬矣余傷碩人且傷雲鳳之志也乃爲銘其墓陳碩人者吳之澹野人也父

某贅錢氏生碩人有令德而故屠君喪其妻繆乃繼碩人屠君客青徐間浮淮逾河轉徙販逐歸途遭寇暴鈔畧殆盡殊無聊碩人曰有亡命也幸而生貨貝易耳乃屏被貿貲縮用經費而家日殷矣舅氏春秋高性且卞急碩人志承色養饋饗紈刺敬豫潔良咸當其意聞舅氏誦讀詩書則端聽靡懈通其大指屠君有弟某四十而無子舅氏頗憂之碩人跽而請曰吾子猶叔子也禮當後遂立爲後而屠君之弟婦某氏頗不遜碩人則折節下之恭而有禮兄弟妯娌雍

如也屠君之亡也碩人病羸柴瘠骨立孤燈敝
帷矢死銜恤日拊其遺孤父之痰喘壅逆而卒
享年四十有三生于成化十五年九月十一日
卒于正德十六年六月四日子男二長即雲鳳
娶鄭次雲鵬娶胡後屠君弟女一嫁顧宣孫男
一玄中銘曰變彼者媯令儀令德宜于而家式
和且則曰未亡人矢死靡忒筑筑遺孤爾誨爾
迪胥臺之松慈雲之栢有鬣者封卜食斯吉於
千萬年銘辭罔泐

朱隱君墓志銘

隱君諱臣字秉忠蘇之吳縣人也曾大父克潤
大父仲聲父廷吉以博士弟子選升國雍舍光
砥行未仕而卒秉忠年方幼孤喪祭備禮且上
無諸父旁寡庶兄讐宗肆不令之瘡黠僕搆喪
貞之厲交侵黨侮既不與較亦不爲讐於是杜
門力學秉翰摛文聲稱籍起公府交薦提學御
史王公鑑之召試竒之命隸縣膠以母老辭後
復試于鄉不第遂絕意于進肆志丘墳每有述
作見賞名流今儀部楊公循吉故太傅王公鏊
咸降尊折行投布衣之交篇章賡和吳人稱焉

隱君行誼潔脩孝友純篤事母沈夫人克盡孝
敬暨其喪也望望焉皇皇焉孺慕連憂情文兼
至再從伯死三喪相繼買地以厝焉陸氏之姑
寡而無依則迎養以終其身周氏之姊貧而守
節則置別第以奉之其厚於人倫類此至若輸
粟入金以佐縣官率先樂義靡曾吝惜有司旌
嘉輒拒不受故工部侍郎永康徐公之刺蘇也
高隱君之行署教曰學博而洽行古而方其朱
處士乎乃延致鄉飲嘗一赴其意後絕不往隱
君高朗毅方貌宇豐碩冠裳古雅言必正色交

必正人雖居逼廛市而志抗青旻著書樂道投
壺雅歌有儒者之風勢位聲利曾弗槩於心故
右都御史盛公應期爲隱君內姪歲時候問肅
拜床下了無遜讓聞者嘆服所著詩文若干卷
藏于家君生于成化乙酉八月庚子卒於嘉靖
癸巳十二月庚午享年六十有九配盛氏故醫
學正術盛公備之女生三男子曰寵娶李曰完
娶伊俱太學生曰宏娶陳繼張遼府禮生女四
長適錢鉉次字顏焯先卒次適兵馬副指揮袁
表及國子生陸健側室張氏生三男子曰宣君

卒之二年以中殤夭曰寔曰守女一皆幼孫男
五用成用明用章用平用康孫女七寵等十以
某年月日葬君于吳縣至德鄉李王村之先塋
乃以孝廉彭君孔加所撰狀乞余銘銘曰考碩
懿兮世作程錫誅謚兮古足徵包質文兮蔚彬
彬耀巖藪兮揭儒林

陶舜舉墓志銘

君諱凱字舜舉其先鳳陽之定遠人也五世祖
蚕哥吳元年從軍徐丞相部中洪武初沒子纏
兒繼隸虎賁衛以告變功授龍驤衛百戶陞山

東威海衛副千戶永樂中子俊襲調蘇州衛之
右所俊生茂茂生三子其季曰廣字孟寬寔生
君君少習儒業頗通書藝而樂與材士游孟寬
無他子君乃承志幹蠱以儉勤振其業凡通都
大賈商于蘇者多主于君以重貲託此其忠信
基之矣事孟寬及母閔氏孝敬隆篤性喜延納
而量存含弘口不言人短長有犯弗校也濫假
貸者亦能曲從之配王氏蘇州衛百戶廷威之
女子男二治娶朱繼姚準娶龔繼吳女一嫁韓
應夏孫男四應龍應鳳應麟應虬孫女一君生

成化某年月日卒嘉靖某年月日享年五十有
七治等卜葬於吳縣胥臺鄉胡搭里祖塋之次
來乞余銘初孟寬之卒也故京兆祝公實銘之
且曰余知孟寬也以凱而治之言曰吾父與祝
公游得其翰牘者數篋今猶襲藏之尊賢好文
即此足銘矣銘曰裔武弁業文儒跡闡屢志詩
書廓先緒兮崇後基

沈子仁墓志銘

吾姊夫沈君子仁既葬其子應奎請銘其墓初
子仁構奇疾醫弗効有醫曰是蠱也陽虛宜食

附子乃多食附子延三年竟不起子仁之亡也
予甚悼之吳江俗夸訐挾貲負勢陵轢氓農其
長鄉賦者率軋沒多收利其羨羸出貸以取倍
稱之息民殊苦之獨子仁純愿謹朴長賦稱平
家有田數頃不知其數歲租亦不問出入佃儻
好客客至即投轄燕飲終日待姻親尤有情沈
故右族而群從多賢先後舉進士子仁如常時
弗以驕人也沈之先居長洲之葑門六世祖師
孟徙吳江師孟生公哲公哲生宗德宗德生本
本生紀子仁紀之第三子也子仁諱山生成化

丙午三月十日卒嘉靖戊戌七月五日享年五十有三配袁氏即我方齋從父之仲子也子男三長即應奎吳江縣學生娶鄭次應箕應斗女二長嫁倪用次太學生陸芝墓在簡村之陽銘曰愿以醇古之良民既有恒產亦有恒心篤於親子仁其仁

陶母閔碩人墓志銘

余既銘陶君舜舉墓其子治泣而請曰吾父之亡也吾大母閔夫人者寔哭之慟邁疾弗起今茲將合窆於先大夫之藏先生其予之銘按狀

閔碩人者諱壽寧吳縣人也父廷圭母朱氏愛碩人不忍嫁也乃贅陶君孟寬于館及孟寬徙居創治生業碩人善佐之精酒醴辟臬麻享賓祀先下御僮奴咸有禮節外內賢之碩人生于美順某年月日卒于嘉靖某年月日春秋七十有八子男一即凱娶王氏女一適陳金孫男二女一曾孫男四女一詳具凱志中袁子曰世之婦人鮮不驕其贅壻者亦鮮不利其父貲碩人善事孟寬無德色從其夫出居棄貲產如遺不少利斯豈世俗婦所能哉傷其子凱以死雖凱

之賢而碩人之愛慈亦足多矣余故不辭而爲之銘銘曰佐厥特兮順以貞慈迺嗣兮殞厥生則殞兮垂休名

太學生董宜陽妻楊氏墓志銘

董宜陽妻楊氏者華亭人也董宜陽父恬官大理寺少卿而恬之父綸爲監察御史楊氏之父璨官應天府丞府丞之子則今吏科都給事中秉義也兩家閥閥等又世姻連故楊氏歸于宜陽宜陽者董之傑也楊氏承父兄之烈秉禮遵教實媲美于宜陽蓋交相愛也姑蘇袁生者世

交董楊故得數聞楊氏之賢大理公不祿董門中落而府丞公父子顯貴焜耀里閭乃楊氏不伎不驕脫珥屏瑱黽勉有亡以佐宜陽宜陽好學與四方魁儒游日事文史絕不問生業蕭然貧也而楊氏布衣糲飯績紡刀尺終夜猶有聲嗚呼其難能已宜陽之計偕北游也楊氏念之竟以病死死之先宜陽在京師夢其妻來京師死之日宜陽在興濟復夢其妻乃果以是日死嗚呼豈思之所感無幽弗通邪余嘗讀劉氏古列女傳未嘗不嘆賢婦人之難也或謂婦人陰

性多妬悍吝驕此豈其然哉如楊氏者又惡媿古列傳邪余讀宜陽之狀而知楊氏婦道之備也孝于父母敬于尊章孫于夫子友于娣姒睦于黨姻嚴于婢僕潔廟享豐賓燕時牧孳旨蔬蓄事無專成動無違禮彼有賢父兄以道之其遷移薰染則有自矣然遽夭死是曷故哉楊氏生正德某年月日卒嘉靖某年月日年二十有六子男二鳳孫後四旬夭蘭孫女一玉瑞某年月日祔竹岡先塋銘曰龍有淵鳳有穴噫而人兮藉世閭璠珉完良玉缺棗施盈兮留夷折天

寔爲之兮夫誰孽

沙良憲夫妻合葬墓志銘

沙之先汴人也洪武中有諱福一者以醫名始家蘇之長洲福一生景名景名生讓讓生濬君其伯子也諱綱字良憲夙稟爽雋雅好絃歌長業化居家日饒豫厥考商游荆襄君獨操門戶靡內顧焉上娛二人旁友諸弟良田華宅推讓弗居家有汝敦之譽鄉稱薛包之美焚券以振窮捐金以周匱宗姪懷其德僮奴樂其恕年未艾服即營菟裘楊孫之達庶幾有焉若乃博延

良師嚴督嗣子愛而知勞尤足多矣厥嬪錢氏
實媿令德丰儀端靜資性慧溫婦道克修母範
有淑恩洽族黨德化妯娌小星均惠螽斯嗣音
組紉罔懈蘩藻致潔儉弗苦節予無妄施猗歟
賢矣君生成化壬辰年八月二十日卒嘉靖辛
丑年十一月二日享年七十錢生成化甲午年六
月二日卒嘉靖壬寅年十二月二十六日享年
六十有九子男三人珙娶朱琛娶劉府學生玘
聘胡俱側室盛出女一人錢所自出館甥常熟
縣醫學訓科陳慈孫男五人宗洋聘錢宗源聘

韓宗流餘未名珙等卜以癸卯年十二月二十
七日合葬於武丘鄉綵雲里之新阡乃奉琛所
撰行狀來乞銘銘曰沙之先國爲氏翁肇昌隱
於市賈而儒攸好義變媯姜協休譽仁逮下繁
厥嗣翮青衿亢來世奄同穴玄窆闕歸鬣封梧
檟樹渙 皇私在愆裔

章翁墓志銘

章翁吳人也諱澤字惟德世居吳之鴈蕩村曾
大父智能大父思恭父鏞母周氏翁質稟竒穎
解絲竹繪畫家素業賈而統順中民間舉弟子

員者輒驚避坐是廢學然時時讀語孟古史即
通其大義性孝友事同母兄淮甚恭淮或有言
弗校也晚歲淮悔悟歡好暨其沒也哭之哀人
以是多翁居鄉言論侃直美髯正色聽者悚敬
稍不可即頰面斥之以是不諧於俗久之其人
卒愧服中歲謝去家事課孫士元習舉子業夜
然膏對坐書室中以為常嘉靖丁酉士元薦於
鄉翁方以疾戒飲捷書至大喜命酒豪飲歌呼
累日客至輒盡醉忽曰吾可以休矣遂卧病不
起享年七十有四元配方氏繼謝氏又繼黃氏

先翁卒子男二長杲娶屠次榮娶蔣女二壻嚴
冠沈暉皆方出也孫男四士元甲辰進士南京
刑部主事娶金士龍聘張杲出也炳娶葛燦未
聘榮出也孫女三壻吳鳳王應龍王時泰曾孫
男四培齡培祐京壽一未名曾孫女二墓在吳
縣靈巖鄉吳山西麓合方碩人兆禮也銘曰載
服賈兮業以振卒聞詩兮蹶以興嗇厥躬兮羸
於孫利後昆兮緜繩繩

故中憲大夫大理寺少卿董公繼室唐

夫人墓表

唐夫人者故大理少卿董公恬之繼室也董公上海人而唐夫人者其先鳳陽泗州人也蓋董公官于京師而繼娶云 高皇帝之起兵鳳陽也有唐春者從焉功授某衛百戶 文皇帝靖難師起累功授大興衛指揮使遷籍京師遂爲京師人唐夫人之八世祖也七傳而至孫麟襲大興衛指揮使贈昭武將軍上輕車都尉寔生夫人而大理公先娶宜人喬喬卒繼宜人 不終卒乃慎簡貞淑而唐夫人善事都尉公又善事母太淑人張有令譽乃歸于董歸則善事

其夫子又善約束其家人居無何大理公遭讒落職頗懷不平將上書訟其寃唐夫人曰是命也夫是命也夫今時何時邪遂歸姑太宜人謝方在堂問大理公曰新婦奚能曰能事夫子又奚能曰能約束其家人太宜人曰是獨不能事其姑邪太宜人嚴少當意者唐夫人事之即當太宜人意太宜人賢之董族蕃門戶鼎盛先御史公有子六人而三子者爲顯官子姓妯娌姻黨僮奴唐夫人善彌縫之即當人人意又人人賢之大理公友其季懷同居者二十年如一日

也寔夫人佐之大理公有妾某氏頗傷公心遣之歸遂將其所生子歸唐夫人曰是吾夫子子也母當歸子亦當歸邪遂不告大理公而追其子還大理公好古圖書且好賓客客嘗滿座而性復落魄不問家人生產唐夫人獨彌縫之凡饗祀饋饗賓庖之需咸取給於內即事事中節大理公之亡也門戶日益衰且多外侮又獨彌縫之持其門戶得無賈墜大理公舉子艱五十七而唐夫人生子曰宜陽宜春又某氏所生子曰宜旭宜春早卒撫其二孤曰是吾先夫子子

也吾子之子之一如已子喬宜人有女三其一存曰是吾先夫子女也吾女之女之又如已子先是謝太宜人之亡也唐夫人哭之慟幾絕大理公之亡也又哭之慟又幾絕病矣旣而病甚曰吾有子矣又奚傷獨宜旭未婚耳又爲畢其婚而卒唐夫人嚴教其子亦嚴訓以義節以禮端其師保慎其交游制其經用罔弗度而宜陽者又善承悅禮而敦文志卓然不群名籍膠庠間君子曰觀大理公之存也唐夫人有婦道焉其亡也有母道焉萊妻與母雖古列傳所載又

何以加諸吾故表焉乃其詳具狀志吾不表表其大者

中憲大夫臨安府知府王公墓表

故中憲大夫臨安守王公既卒之四年仲子良樞謀伐石表墓以彰遐烈乃奉大司空安仁劉公志銘俾姑蘇表生表其事表曰王公者諱濟字汝舟故越之新昌人也宋之南渡有曰鑑者遷居烏程之庚村王公之八世祖也高祖燦曾祖文祖賢禰宗和以公貴贈奉政大夫南京兵部郎中配施宜人生二子伯曰觀仲即王公王

公十歲而誦詩書十四而明經補邑學弟子員成化丁酉薦于鄉辛丑舉進士觀政于兵部虜囚扯因帖木兒來歸王公以材譽奉命管押安罌之廣州至則約束撫馭信宿而反初授南京兵部車駕司主事車駕司有馬快船千艘歲中人貢方物于大官率利多占凡一人多者十艘少乃六七悉私載貨賈販騷擾驛傳而料造侵牟費且不訾武衛彫耗蒞事者畏中人聲勢莫敢問王公於是創制布規立廠水濱畫以司屬工費有經而中人之舟始減什七矣乃又以

材譽遷郎中怨者曰王郎中驟遷官也大司馬
三原王公方謂淹也上書訟公功謗乃寢大司
徒九峯孫公亦官兵部公與齊名三原公亟材
之而公之歸艱也莊公孔暘贈以言曰汝舟未
至車駕不在車駕汝舟既至車駕不在江淮時
人以爲名言既乃補武庫司郎中武庫司與皂
銀歲久多積羨而勾校無法胥史爲奸王公於
是覈實簿正日程月稽歲終則會其贏于戶部
稍遷臨安守臨安滇之劇郡也土多金珠貝玉
象齒文犀奇香珍藥流溢五方其俗好貨習鬪

輕死樂盜劫殺公行王公於是勵躬率下俗變
盜弭張教興文甄材颺陋嘗薦士楊宗堯發解
滇省宗堯卒以文顯蓋居臨安者三年而境內
大治部刺史疏其績太宰叙其能將大用之而
公引年乞歸矣歸則田于庚村之陽屏跡司府
放懷湖山故少保閔公中丞張公憲副吳公別
駕沈公侍御陸公少叅王公相與結社遨游觴
詠終其天年初武皇帝之立也詔進王公亞
中大夫階今皇帝之立也又詔進中奉大夫
階大禮成又詔進中憲大夫階享年八十有三

云表生曰夫士孰不欲用世哉而志以運隳功以材局是以有用有不用而用者亦未必究厥志也王公位不過岳牧秩不過中奉而功揚於郎署澤衍於滇夷國稱瑚璉鄉推儀羽雖志不盡究抑亦用世之髦杰矣表生戍湖者二年考德之暇嘗周咨父老曰王公長者也且以仲子良樞之賢乃於是表王公之墓云

張文理墓表

張文理者名敞字文理蘇之長洲人也曾祖謙祖昱父灝字思本世力田居葑溪至文理家始

昌文理以田爲家昧爽率傭奴操畚鍤趨田中力作課相窳勤時藝耘耨咸有成法視他農歲率倍入其初蓋田數十畝末年畝乃什倍又善籌筭廢居斂散嗇約靳費由是家大昌以貲堆一鄉一鄉人咸推之舉以爲長他長鄉賦者咸破產以償官且多逋稽鄉小民咸病其多收乃文理不破產不逋稽亦不多收爲小民病而家日益昌乃推所贏餘以恤其鄉人之不足者脩橋梁創義塾鄉人稱之文理性純孝思本之喪也致毀中禮母薛夫人在堂年百歲矣躬羞食



原件短缺

P35

飲察寒煖起居之節候伺顏色必得其歡心薛夫人老健強不扶杖文理獨掖扶之歲時薛夫人坐堂上文理拜於前諸孫曾元羅拜於後幾滿堂薛夫人顧益喜呼文理曰老兒子此與萊子何異哉薛夫人喪文理年七十矣其哀毀猶喪思本也始文理以田起家諸子咸業農其孫乃多力學者曰元卿曰之綱俱爲太學生於是張氏頗以文學顯文理享年七十有二子男四人孫男十二人曾孫男十人女二人孫女十二人曾孫女四人袁子曰自世衰俗偷而孝弟力

田者寡矣文理雖不仕孝于家得百歲之母歡心可不謂難乎服田力穡以廣其堂構子孫仍仍凡五世文理以詩書貽之尤難矣哉

殷君同妻姚碩人合葬墓志銘

嘉靖丁未三月壬申日殷生乾將葬其父母於支硎山之祖塋以墓銘請乃按刑部主事章伯允之狀而志之志曰殷君者吳人也諱福字天祐世居郡城西之花園村曾大父晟大父遜父璿母印氏家故力田而璿早嬰疴疾業中衰君出綜家政入侍醫藥父病尋差家業亦理人稱

孝焉歲長鄉賦稱平新安大賈浮巨木於吳者
必主君君敏斷有信義持籌立水濱凡榷楠豫
章之材圍徑小大價高下一言立決賈人咸帖
伏鄉之人有不平者輒就君質是非性喜賙貸
里社久廢割腴田以復之嘗鬻一僮奴其兄忽
暴卒問其父且無嗣矣即以歸之君伉直不畏
疆禦每論事虬髯輒奮張歲乙巳吳大旱飢君
奉縣檄督浚河渠晝夜勞苦不少休子姓請少
緩君曰此公事急於救焚可便私自逸耶遂遘
疾不起卒之前猶商推畚鍤便宜比屬續不及

家事獨曰開河開河而已嗟乎今之受直怠事
者視君何如哉君生成化之庚子享年六十有
六卒之明年配姚氏亦卒生於成化之壬寅享
年六十有五姚故橫塘之儒家女也父仲暉世
業耕讀既歸殷君淑孝儉勤外內宜之子男二
人長即乾邑庠生次卯生側出也小星之惠人
尤以爲難女三人婚顧琇尹俸錢恩孫男女四
人銘曰力於農以亢厥宗勩於公以瘁厥躬夫
乘化兮妻令終埋雙玉兮藏玄宮

袁永之集卷之十六

袁永之集卷之十六

十一

